




Kutxabank ikasgeletan. Nork ireki dio azeriari oilategiko atea?

Mikel Garcia Idiakez

@mikelgi

EH Bilduk mahaigaineratu du gaia, Eusko Legebiltzarrean Hezkuntza Sailari eskatutako informazioaren harira. Jendea etxetik kaleratzen errege, klausula abusiboekin eta preferenteekin herritarrek itotzen aritua, bezeroei neurritz kanpoko komisiok kobratzeagatik salatua eta iruzur egiteagatik epaitegietan kondenatua, Kutxabank alegia, finantza ikastaroak ematen ari da ikastetxe publiko eta kontzertatuetan. Altruismoaren haizeak jo du eta iruzur horiek nola saihestu irakatsi nahi die bat-batean gaztetxoek, ala etorkizuneko bezeroak lotzea eta bankuen inguruan eraikitako kontsumismo eta ekonomia eredu jakin bat txikitatib barneratzea du helburu? Eta batez ere, nolatan ireki dizkiete parez pare eskolako atearik interes pribatuak dituen erakunde honi?

Pagotxa da Kutxabankentzat: gaztetxoaren artean konfiantza eta fidelotasuna sortu eta aurrezki kontua irekitzen dutenean bere sukurtsaletan egitea lortu dezake batetik; eta edukien kontrola bermatu dezake bestetik, nahi duena irakatsiz, eta nahi ez duena ez. Logikoagoa litzateke ikuspegi zabalagoa eman dezakeen –esaterako bankuek diruarekin egiten dutenaz, banku etikoez, alternatibez... ere hitz egingo duen– Ekonomia irakasle bat ar-

duratzea ikastaroaz, eta ez interes pribatuei erantzuten dien banku bat.

Ikastaroa bi saio dira guztira eta *Finantzak bizitzarako* du izena. Saio horietako batean izan da ETB eta bertan erakutsi zaigunaren arabera, abiapuntua da “zure bizitzako ilusioa lortzea”, adibidez, ikasleei entzun diegunez, ziklomotorea erostea edota mugikorra zortzi hilabetetan erostea. Ilusioa egia bihurtzeko –dirua lortzeko– bi-deak aztertu dituzte ondoren, eta banketxeko ordezkariarentzat saioaren ondorio inportanteetako bat da “aurrezki kutxan dagoen dirua ez ukitzea”. Gazteetako batek dioenez, “libretan dagoen dirua hor uztea eta zuk irabaztea” baita helburua.

Jaurlaritzari galdera

Ikasturte honetan, Kutxabanken ikastaroetan 14-16 urteko 1.700 ikasle inguruk parte hartzea da asmoa. EAEko hainbat ikastetxe publiko eta kontzertatutan ari dira, eta EH Bilduk adierazi du ikastaroa kentzeko ahaleginak egingo dituztela. Eusko Jaurlaritzako Hezkuntza Sailari galdera ere egin diote saio hauen iturburua ezagutzeko, eta jakiteko, adibidez, ea ikastetxeek banketxearekin zuzenean lotutako ekimena den, ala administrazioak zerikusirik duen.

Martxa honetan, noizko Mc Donald's elikadura burujabetzaz ikasgelan? Farmazeutikak osasunaz? Petronor ingurumenaz?...

EKONOMIAREN TALAIAN

Espainiako Estatua, Troikaren esklabo



Juan Mari Arregi

Espainiako Kanpo Harremanetarako ministroak dio “austeritatearekin pasa” egin direla. Orain erraza da esatea, Troiak berak onartu baitzuen, eta Espainiako Estatua haren morroia da. Europako Banku Zentralak, Europako Batzordeak eta Nazioarteko Diru Funtsak osaturik, Troiak bere helburu ekonomikoak bete ditu, baina kostu sozial ikaragarria eraginez. Horixe da Europako hainbat txosten ofizialetan ageri den ondorioetako bat. Zor subiranoa ez ordaintzea eragotzi dute, baita defizit mugaren helburuak betetzea ere, eta Espainiako banku sistemarengan konfiantza berreskuratzea lortu dute. Erreskate horren kostu soziala, aldiz, “gehiegizkoa eta zoritxarrekoa” izan da, azaldu dute zinikoki. Txosten horietan “atsekabea” agertu dute: osasungintzan murrizketak izan direlako, diru-sarreraren banaketan desoreka eragin duelako eta pobrezia izugarri handitu eta etxegabetzeen olatu bat egon delako, baita inbertitzaile txikiak kaltetuak izan direlako ere.

Orain, Troiak Espainiari exigitu dio beste 9.000 milioi euro murrizteko, eta beti bezala langile eta herritarren bizkar izango da. Egungo kapitalismoaren interesen kudeatzaile den neurrian, banku eta multinazional handiak ordezkatzeko dituen Troiak barre egiten du herritarren kontura, basakeria sozial berarekin ari den bitartean. Davoseko mundu foro kapitalistan zenbaitek ohartarazi zuen doikuntza politikek ezegonkortasun soziala areagotu zezaketela (grebak, manifestazioak, okupazioak...). Baina badakite erresistentzia eskasa eta isolatua dela oraingoan. Harresi antikapitalista indartsu eta solidarioa parean aurkitzen ez duten bitartean, jarraituko dute euren politika antisozialekin.